



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DLXXVII. ad annum DXC.

Parisiis, 1644

Epistola CIV. Gregorii Papae I. Ad Occillianvm. Sabinum episcopum
commendat.

urn:nbn:de:hbz:466:1-15221

videamur, & nostra ei promissio in dubium veniat: & si qua de futuro, quod absit, necessitas fuerit, occasionem inueniat qualiter nostræ petitioni consentire non debeat. Et ideo petimus, vt sicut & a prædicto filio nostro excellentissimo poposcimus, gloria vestra ea qua nobis caritate vnita est peragat; quatenus antequam homines ipsi ab Arogis reuertantur, rex eis sub festinatione scripta transmittat, quæ tamen ad nos deferantur, in quibus eis præcipiat vt nos subscribere non petat. Sed si tantum est, Gloriosum fratrem nostrum, vel de episcopis vnum, aut certe archidiaconum subscribere faciemus. De persona vero Augusti gratias agimus, atque studemus, vt cum aduersario suo causam suam secundum æquitatem definiat, qui ita illi, ne illuc exhiberetur, laborem imponi nolimus, vt tamen aduersario ipsius iustitiam non negemus. De aliis autem, quia digne vobis gratias agere necdum occurrimus, in subsequenti responsalem dirigemus, per quem in caritate, qua ad alterutrum nexi sumus, amplius miserante Domino constringamur. Præterea gloriæ vestræ mœror nos vehementer afficit: sed quia vir sapiens ea quæ per consolationem dicenda sunt cuncta nouit, verbis vos consolari cessamus, sed oratione prosequimur; petentes vt omnipotens Deus vitam & salutem vestram vestrorumque omnium pietatis suæ protectione custodiat, & cor vestrum in afflictione positum consoletur.

EPISTOLA CIV.

GREGORII PAPÆ I.

AD OCCILLIANVM.

Sabinum episcopum commendat.

Gregorius Occilliano tribuno Hydruntino.

COGNOSCENTES magnitudinem vestram de Rauennatis partibus cum ordinatione excellentissimi filii nostri domni exarchi ad Hydruntinam ciuitatem feliciter remeasse, grate suscepimus, & Dominum exoramus, quo actus vestros suæ propitiationis opitulatione disponat. Sabinus siquidem frater & coepiscopus noster ad nos veniens, graues nobis ciuium suorum querelas innotuit, asserens a Viatore ex tribuno Hydruntinæ ciuitatis multa se

hactenus illicita pertulisse. Magnitudinem ergo vestram paterno salutantes affectu hortamur, vt quidquid pridem male gestum esse cognoscitis, iudiciaria debeatis emendatione corrigere. Scitis etenim quod locus ipse ecclesiæ nostræ sit proprius, & ipsi pauci qui illic rustici remanserunt, si in aliquibus incompetentibus angariis vel oppressionibus affliguntur, locum ipsum deserunt, & quod non optamus, hostibus datur illum occasio peruadendi. Prædictum ergo episcopum, omnesque habitatores loci ipsius vobis peculiariter commendamus, vt non solum nullis illicitis iniunctionibus onerentur, sed magis ex commendatione nostra, vestra sibi in omnibus sentiant adesse solatia, vt & beatus Petrus apostolorum princeps, cuius res ipsa est, vobis retributor existat, & nos in vestris promptius vtilitatibus commodemus.

EPISTOLA CV.

GREGORII PAPÆ I.

AD SABINIANVM EPISCOPVM CALLIPOLITANVM.

Ne patiatur res ecclesiæ angariis prægrauari.

Gregorius Sabiniano episcopo Callipolitano.

INDICATVM nobis est quod homines Callipolitani castri, in quo te propitiantem Domino esse constituimus sacerdotem, grauibz diuersorum molestiis affligantur, atque in longinquis angariis multisque dispendiis conterantur. Hortamur ergo fraternitatem tuam, vt quia & locus ipse nostræ, sicut cunctis notum est, ecclesiæ esse dignoscitur, sollicitudinem tuam rectæ defensionis zelo succendas, eosque non permittas illicitis prægrauari: quia & exemplaria tibi priuilegiorum ecclesiæ de scrinio nostro ob hoc fecimus dari, quatenus informatus ex omnibus, qualiter habitatores loci illius defensare valeas non ignores. Volumus etiam vt massæ ipsius Callipolitanae homines sub sollicitudinis tuæ cura a futura tertia indictione habere debeas, atque de eorum releuandis molestiis esse cautissimum, & adhibita sollicitudinis cura, vniuscuiusque vires quid præstare de sua pensione ecclesiæ vtilitatibus valeant, caute cognoscere, ac secundum vires suas ad persoluendum quemque disponere. De qua

Concil. Tom. 13.

Xxxx ij